

## ESTATUTOS DEL PARTÍU ASTURLANISTA

(Aprobaos pol Congresu del Partíu'l 28 de xunu de 2008)

(Enxerta les modificaciones aprobaes pol Congresu del Partíu'l 17 de payares de 2018 y les aprobaes pol Congresu'l 14 de setiembre de 2019)

### PREÁMBULU: PRINCIPIOS Y OXETIVOS

El Partíu Asturianista ye un partíu democráticu, asturianista, interclasista y de progresu, que tien como oxetivos el caltenimientu dinámicu de la identidá d'Asturies; l'espoxigue material de los asturianos; l'algame de los bienes culturales apropiaos pal afitamientu d'una sociedá llibre y una opinión pública non remanada; l'afalamientu la creación artística y el so espardimientu; l'ameyoramientu la calidá de vida, faciendo compatibles l'esporporle económicu col respetu al entornu mediuambiental; la protección de los sectores sociales menos favorecíos; facer posible'l desendolque vital del individuu hasta la llende les sos capacidaes; procurar la igualdá d'oportunidaes nel accesu al trabayu; sofitar les iniciatives creadores, tanto tecnolóxicos como industriales o comerciales. Too ello, mediante l'usu democráticu de los medios d'acción política consagraos na Constitución Española, agabitando la llibre formación d'un estáu d'opinión favoratible a los postulaos del Partíu Asturianista, y gobernando dende les instituciones democrátiques d'alcuertu con ellos.

### TÍTULU PRELIMINAR

I. La denominación del partíu ye la de Partíu Asturianista, afitando'l so domiciliu social en Xixón, Asturies, cai Julio, nº 3, 5º Izda, c.p. 33209.

II. Les sigles del Partíu Asturianista son: PAS.

III. El símbolu del Partíu Asturianista va tar formáu por una media fueya de xardón (carrascu, briscu, cast. *acebo*), Ilex Aquifolium, a la izquierda, y les sigles (PAS) del partíu; el color de la fueya compónse en tonalidaes verdes, y el de les sigles en tonalidaes d'azul. El símbolu pue dir acompañáu al pie de la denominación del partíu con toles lletres (PARTÍU ASTURIANISTA); les representaciones gráfiques con les siguientes:



IV. El sitiü web del partíu ye [www.asturianista.es](http://www.asturianista.es). Les direcciones de corréu electrónicu del partíu son [partiuasturianista@gmail.com](mailto:partiuasturianista@gmail.com) y [xesuscv.com](mailto:xesuscv.com).

V. L'ámbitu d'actuación del Partíu Asturianista ye l'Estáu español.

VI. El Partíu Asturianista declara espresamente'l so acatamientu a la Constitución Española y, en

consecuencia, organízase baxo los principios de democracia interna, llibertá de concencia, llibre pensamientu y llibertá d'espresión, garantizándose la participación de tolos afiliaos na formación de la voluntá del partíu.

VII. El Partíu Asturianista constitúise ensin patrimoniu fundacional. Los sos ingresos provendrán de les cuotes qu'abonen los afiliaos na cuantía y mou que s'estableza polos muérganos competentes según estos Estatutos, de les subvenciones públiques y de tolos otros ingresos que la llei almita como moos de financiación de los partíos políticos.

VIII. El Partíu podrá disolvese por alcuertu del so Congresu. El destín que se-y dea al so patrimoniu va fixalu l'alcuerdu de disolución, debiendo en tou casu designase al beneficiariu o beneficiarios, que deberán ser entidaes ensin ánimu de llucru o instituciones con domiciliu y vinculación con Asturias, y tener ente los sos fines la promoción de les sos manifestaciones culturales, el progresu material de los pueblos, parroquies y conceyos que formen el so territoriu o la llibertá y bienestar los sos habitantes.

IX. El réximen documental y alministrativu del Partíu Asturianista sedrá l'afitáu na llexislación vixente. En particular, sedrá responsabilidad de la Secretaría Xeneral la llevanza'l Llibru Rexistru d'afiliaos, el Llibru d'Actes y los llibros d'Inventariu, Balance ya Ingresos y Gastos.

## TÍTULO PRIMERU: DE LOS AFILIAOS

**Art. 1.** Puen afiliase al Partíu Asturianista tolos españoles mayores d'edá que tean nel plenu usu los sos drechos políticos, y cuyu ingresu fuere aprobáu polos muérganos competentes afitaos nestos Estatutos. Los datos personales de los afiliaos quedarán rexistraos nun ficheru que se rexirá polo dispuesto na Llei Orgánica 15/1999, de 13 de avientu, de Protección de Datos de Carácter Personal, baxu la responsabilidad de la Executiva Nacional.

Les afiliaciones producies nel mes inmediateamente anterior al de la fecha la convocatoria del Conceyu Estraordinariu pa renovar la Executiva l'Agrupación y los representantes na Xunta Nacional, y del Conceyu previstu nel art. 21 pa escoyer los delegaos al Congresu'l Partíu quedarán en suspensu del drechu d'escoyer a los muérganos de gobiernu del Partíu hasta tantu se completen dichos procesos.

Los candidatos a formar parte de la Executiva l'Agrupación, Xunta Nacional o delegaos al Congresu deberán tener una antigüedad nel Partíu superior a un añu.

Nel alcuertu de constitución de nueves agrupaciones podrá eximise o rebaxase'l requisitu d'antigüedad.

**Art. 2.** La pitición d'ingresu fadráse delante la Executiva l'Agrupación del conceyu residencia, que la tien d'empobinar a la Executiva Nacional pa la so aprobación definitiva; nostante, los efectos de l'aprobación retranscribiránse a la fecha la pitición.

Cuando daquién quixere afiliase n'Agrupación estremada de la del llugar de residencia, la Executiva Nacional, enantes d'aprobar l'alta, consultará coles executives de l'Agrupación del conceyu residencia y d'aquella a la que cinque la pitición. En tou casu, los enxertamientos fuera'l conceyu residencia han xustificase y han tener calter escepcional, que podrá revocase de forma xustificada pola Executiva Nacional.

**Art. 3.** Cualquier afiliáu podrá impugnar l'ingresu aprobáu pola Executiva mediante escritu empobináu a la mesma. Si la Executiva se reafitase na so decisión, l'afiliáu retolicante podrá apelar a la Xunta Nacional al traves de la Executiva Nacional. N'ambos casos l'escritu espresará les razones de la oposición.

La Executiva Nacional pidirá-y informe a la de l'Agrupación, que xuntu col escritu'l retolicante y l'informe de so elevarálos a la Xunta Nacional pa decidir n'alcuerdu definitivu. La impugnación talantarásese rechazada nuna y otra instancies pasaos tres meses ensin respuesta, contaos dende la fecha d'aportamientu l'escritu aniciador.

**Art. 4.** Son drechos de los afiliaos:

- a) Recibir información y formación respective la política del Partíu.
- b) Participar, al traviés de los calces y muérganos establecíos, na toma de decisiones.
- c) Escoyer, pelos procedimientos estatutarios, los muérganos de gobiernu del Partíu.
- d) Ser escoyíu como miembru de cualquiera d'ellos.
- e) Ser escoyíu pa representar al Partíu nes llistes electorales, y darréu d'ello nos cargos institucionales.

- f) Esponer llibremente les sos opiniones, tanto per escritu como oralmente, dientru los calces y muérganos del Partíu.
- g) Facer usu de los mesmos drechos nos medios de comunicación, siempre que con ello nun incumpliera les obligaciones como militante señalaes nel artículu quintu.

Art. 4 bis. Los afiliaos van poder impugnar los alcuerdos adoptaos polos muérganos del Partíu que sean contrarios a los Estatutos o a una disposición vixente.

La impugnación va poder interponese en cualuquier momentu mediante escritu empobináu a la Executiva Nacional, que solicitará a la Comisión de Garantíes Democrátiques un informe sobre los sos fundamentos; si la Comisión de Garantíes Democrátiques atopase fundamentu na impugnación daráy treslláu al muérganu qu'adoptó l'alcuerdu pa que, nun plazu nun superior a quince díes, modifíquelu o anúlelu. Si nesí plazu el muérganu se ratificase nel alcuerdu adoptáu, o la modificación nun fuera congruente col informe desurdíu de la Comisión de Garantíes Democrátiques, requerirá a la Executiva Nacional pa que nun plazu non superior a un mes someta la impugnación a la Xunta Nacional, que podrá arreyase a la mesma y anular l'actu, modificalu pa que s'adapte a la Llei o a los Estatutos o rechazala dafechu. En tou casu, l'alcuerdu ha motivase. L'alcuerdu la Xunta Nacional será inapelable.

**Art. 5.** Son obligaciones de los afiliaos:

- a) Abonar les cotizaciones establecies.
- b) Acostinar coles decisiones tomaes polos muérganos competentes, d'alcuerdu colos procedimientos afitaos nestos Estatutos.
- c) Agabitar nes llabores del Partíu, na medida que-y fuere posible, col so trabayu y la so conocencia.
- d) Procurar, nes sos actividaes privaes, sofitar los principios y oxetivos del Partíu.
- e) Cumplir coles xeres y obligaciones del cargu, si ye cargu electu dientru los muérganos de direcció del Partíu, en cualuquiera de les sos estayes.
- f) Cumplir col compromisu programáticu y de representación del Partíu en cualuquiera de los cargos públicos pa los que resultare escoyíu.
- g) Nel casu los cargos públicos, tendrán amás la obligación d'agabitar al caltenimientu económicu del Partíu, apurriendo un porcentaxe de les percepciones que se devenguen pol exerciciu de dichu cargu. La cuantía y modalidaes de la mampurra al Partíu estableceráse pola Xunta Nacional, d'alcuerdu colo dispuesto nestos Estatutos.

La mesma obligación tendrán los funcionarios y emplegaos del Partíu, na cuantía y modalidaes aprobaes pola Xunta Nacional.

**Art. 6.** Abrirás espediente sancionador a quien contraviniere o incumpliere les obligaciones del artículu quintu, o cayere en dalguna de les causes de sanción establecies nestos Estatutos. Nel casu d'impagu cuotes, la Executiva Nacional podrá dar la baxa alministrativa ensin necesidá d'espeditente sancionador.

L'espeditente sancionador puede ser individual o colectivu. Podrá ser colectivu nos casos nos que'l frayamientu responsabilidá cincare a toa una agrupación o a les sos instituciones de direcció y representación. Cuando afectare a la Executiva l'Agrupación, la Executiva Nacional podrá suspendela cautelaramente nes sos funciones.

Nos casos d'espeditente colectivu, podrán abrise espeditentes individuales cuando asina lo pidieren los interesaos o paeciese que determinaes conductes o actos podríen sigularizase o escluisse del espeditente colectivu.

**Art. 7.** L'espeditente sancionador podrá entamálu cualuquier muérganu colexáu del Partíu, d'oficiu o a solicitú d'un afiliáu, fecha per escritu con esposición de causa. El muérganu competente pa resolver l'espeditente sancionador ye'l Tribunal del Partíu, que deberá pronunciase, espresa y razonadamente, nun plazu non superior a tres meses dende que-y aportare l'escritu aniciador.

## **TITULU SEGUNDU: DE LA CADARMA TERRITORIAL**

**Art. 8. 1.** El Partíu Asturianista encadármase territorialmente n'Agrupaciones. L'Agrupación tien como ámbitu territorial mínimu'l correspondiente a un conceyu. Podran xunise, a efectos de constituir una Agrupación, los territorios de dos o más conceyos averaos ente sí.

2. La Executiva Nacional del Partíu ye'l muérganu competente p'aprobar la constitución de nueves agrupaciones, dando cuenta a la Xunta Nacional.

**Art. 9.** 1. El númberu mínimu pa constituir una Agrupación ye de cinco militantes. Los militantes que residan nun conceyu onde nun tea constituía una Agrupación serán afiliaos pola Executiva Nacional en dalguna de les constituíes, col fin de que puedan exercer los sos drechos como militantes.

2. Los militantes que residan temporal o permanentemente fuera d'Asturies podrán formar agrupaciones nos sos llugares de residencia. Estes agrupaciones, xunto colos militantes aisllaos, encadarmaránse como Unidá Orgánica Exterior, que se relacionará directamente cola Executiva Nacional.

**Art. 10.** Los muérganos de l'Agrupación son:

- el Conceyu l'Agrupación,
- la Executiva l'Agrupación.

Les agrupaciones del Partíu con más de doscientos militantes podrán celebrar congresos pa escoyer la Executiva l'Agrupación, aprobar programes electorales y propuestes d'actuación o formar y proponer candidatures. La celebración del Congresu sedrá propuesta pola Executiva l'Agrupación y aprobada en Conceyu Xeneral de la mesma. El Congresu rexirásse pol Reglamentu Congresos del Partíu, no que fuere aplicable; les duldes o llagunes sedrán resueltas pola Executiva Nacional.

**Art. 11.** El conceyu l'Agrupación fórmenlu tolos militantes. Aconceyarásse, con calter ordinariu, una vegada al trimestre, y estraordinariamente cuando lu convoquen la Executiva l'Agrupación o la Executiva Nacional.

**Art. 12.** La convocatoria, fecha pel procedimientu que s'atope más afayadizu pa que d'ella entren en conocimientu tolos militantes de l'Agrupación, precederá polo menos en siete díes a la fecha celebración, y asoleyará los asuntos a tratar. Los conceyos ordinarios inxerirán, necesariamente, los siguientes puntos:

- Relación d'altos y baxes.
- Información sobre les sesiones de los muérganos de representación de les agrupaciones.
- Entrugues y propuestes.

**Art. 13.** Los militantes podrán solicitar a la Executiva l'Agrupación la convocatoria d'un conceyu estraordinariu. La solicitud requier la firma de la metada más ún de los afiliaos, nos casos en que l'Agrupación tenga menos de quince afiliaos. Nel casu de que fuere mayor, requerirá la firma d'un terciu los militantes y, en tou casu, un númberu superior a diez. Los firmantes deberán tar al día nes cotizaciones correspondientes al mes inmediatamente anterior al de la fecha la pitición.

La pitición propondrá un Orde del Día pal conceyu estraordinariu, que podrá ser ampliáu pola Executiva l'Agrupación o, nel so casu, pola Executiva Nacional.

La Executiva l'Agrupación tien la obligación de convocar el conceyu estraordinariu nel plazu másimu de dos meses, a partir de la entrega la solicitú. Pasaos los dos meses ensin que fuere convocáu, los solicitantes podrán reiterar el petite delantre la Executiva Nacional; nesti casu, el plazu convocatoria correrá dende que se recibiere la pitición.

**Art. 14.** Nes agrupaciones constituirásse una Executiva l'Agrupación compuesta por tres miembros, salvo que'l propiu Conceyu alcuerde otru númberu, definiendo, nel so casu, les funciones de los puestos que se creen. El mandatu la Executiva durará cuatro años.

La Executiva l'Agrupación escoyerásse en Conceyu Estraordinariu convocáu a esi solu efectu con, como mínimu, quince díes d'antelación. La votación será secreta.

La Executiva l'Agrupación aconceyarásse como mínimu una vegada al mes, convocada pol Secretariu Xeneral con tres díes, al menos, d'antelación. La convocatoria propondrá l'Orde del Día, que podrá ser ampliáu, una vez aconceyada, a propuesta de cualquier de los sos integrantes. Los alcuerdos tomaránse por mayoría simple. El quórum necesariu pa constituise válidamente será de la metada más ún de los sos componentes.

**Art.15.** 1. La convocatoria de conceyu estraordinariu pa renovar la Executiva l'Agrupación deberá ser

comunicada a la Executiva Nacional. La convocatoria inxertará los plazos y procedimientos pa la presentación de candidatures; les candidatures serán cerraes.

Recibida pola Executiva Nacional la comunicación a que se refier l'apartáu anterior, el Secretariu Finances certificará la relación de los afiliaos que tean al día nel pagu cuotes nel mes inmediatamente anterior al de la fecha la convocatoria; esta llista asoleyaráse, por plazu minimu de tres díes, na sede l'agrupación o, de non habela, na sede central del Partíu. Les reclamaciones sobre enxertamientos o exclusiones na llista d'afiliaos al corriente pagu podrán presentase directamente al Secretariu Finances del Partíu, hasta les 22 hores del tercer día inmediatamente anterior a la fecha del conceyu estrordinariu, salvo que fuere sabadu o festivu, en cuyu casu'l plazu prorrogarásse al siguiente día hábil.

**Art. 16.** La Executiva entrante remitirá a la Executiva Nacional copia del Acta del conceyu estrordinariu, colos resultaos de la votación y los datos de los candidatos escoyíos.

Cuando l'Agrupación fuere incapaz de constituir una Executiva, o la qu'hubiere quedare suspendida o inhabilitada, la Executiva Nacional nomará, provisionalmente, una Xestora, dando cuenta d'ello a la Xunta Nacional.

El procesu pa constituir nueva Executiva l'Agrupación será empobináu, nesti casu, pola Executiva Nacional.

**Art. 17.** Los cargos de la Executiva l'Agrupación son:

- Secretariu Xeneral.
- Secretariu d'Organización.
- Secretariu de Relaciones Institucionales.

**Art. 18.** Son funciones de la Executiva l'Agrupación, amás de les asoleyaes n'otros artículos d'estos Estatutos:

- a) Informar a los afiliaos y al Conceyu l'Agrupación de cuanto cincare l'actividá o los oxetivos del Partíu.
- b) Treslladar esta mesma información a los muérganos nacionales.
- c) Representar al Partíu nel ámbitu'l conceyu.
- d) Proponer a l'asamblea y a los muérganos nacionales cuantes ideas o actividaes pudieren servir de sofitu pal algame los fines del Partíu.
- e) Treslladar les propuestas que nel mesmu se-y aporten.
- f) Xixilar el puntual pagu les cuotes.

### TÍTULU TERCERU: DEL CONGRESU'L PARTÍU

**Art. 19.** El Congresu ye'l muérganu másimu del Partíu. Celebrarásse cada cuatro años y nél tarán representaes, en proporción al númberu militantes, toles agrupaciones constituíes.

Si, por cualaquiera razón, el Congresu debiera retrasase más de seis meses, o la Executiva Nacional estimare conveniente que fuera asina por razones de frasca xustificada, deberá plantealo delante la Xunta Nacional; l'alcuertu pa retrasar el Congresu adoptarálu la Xunta Nacional por mayoría simple. L'aprobación arreyará la fecha tope de la suspensión o la fecha definitiva del Congresu.

**Art. 20.** El númberu de congresistes, asina como los índices de proporcionalidá, fixarálos la Xunta Nacional na convocatoria'l Congresu Ordinariu, fecha con, polo menos, tres meses d'antelación a la fecha d'aniciu.

**Art. 21.** Los congresistes escoyerálos el Conceyu l'Agrupación, pol sistema mayoritariu, en llistes abiertes, pudiendo votar cada afiliáu por, como másimu, un númberu candidatos igual al 75 % los puestos a cubrir. La votación será, en tou casu, secreta. Cuando'l 75 % los puestos nun fuere númberu enteru, iguarásse por defectu.

**Art. 22.** La Xunta Nacional fixará, na convocatoria, l'Orde del Día, qu'inxerirá, en tou casu, Rindición de Cuentas y Xestión de la Executiva y renovación de la mesma.

**Art. 23.** El Reglamentu'l Congresu aperiáralu y aprobarálu la Xunta Nacional, faciéndolu llegar a les

agrupaciones con un mes d'antelación como mínimo a la fecha celebración del Congreso. Na primer sesión del Congreso constituiráse una mesa antigüedad, escoyéndose más tarde la mesa definitiva.

**Art. 24.** Los proyectos de Ponencia aperiálos y aprobarálos la Xunta Nacional.

Darréu, empobinaráse a les agrupaciones pa conocimientu y presentación d'enmiendes, tanto individuales como d'agrupación. El plazu presentación d'enmiendes nun sedrá inferior a un mes. Les enmiendes que seyan sustancialmente iguales podrán amestase nuna sola.

**Art. 25.** El Congreso será l'únicu muérganu competente pa decidir nes siguientes cuestiones:

- a) Camudamientu los Estatutos.
- b) Elección de la Executiva Nacional y del Tribunal del Partíu.
- c) Definición ideolóxica y afitamientu principios.
- d) Disolución o amestaúra del Partíu con otres fuerces.
- e) Cualquiera otra que, como tal, establezan estos Estatutos.

**Art. 26.** Les cuestiones reservaes al Congreso decidiránse por mayoría absoluta de los sos miembros. La mayoría necesaria pa l'aprobación d'otros asuntos establecerá'l Reglamentu'l Congreso.

El Congreso podrá acordar por mayoría absoluta l'enxertamientu nel Orde del Día d'asuntos que nun figuren na convocatoria.

Les deliberaciones nel Congreso entamarán cola esposición de la propuesta sometida a debate pol delegáu proponente, a la que podrán seguir intervenciones a favor y escontra; el proponente podrá facer en tou casu la cabera intervención, tres lo cual la propuesta será puesta a votación. La Presidencia del Congreso podrá llimitar el númberu d'intervenciones a favor y escontra, asina como l'asignación de tiempu pal debate y la so distribución ente los que tengan solicitao intervenir.

**Art. 27.** La Xunta Nacional podrá convocar Congresu Extraordinariu mediante alcuerdu aprobáu pola metada más ún de los sos miembros. L'alcuerdu señalará l'Orde del Día 'l Congreso, la fecha y el Reglamentu de funcionamientu'l mesmu.

**Art. 28.** L'Orde del Día del Congresu Extraordinariu será incamudable, pero'l propiu Congresu podrá autoconvocase como Ordinariu, dexando ente la convocatoria y la fecha celebración tres meses como mínimu.

#### **TÍTULO CUARTU: DE LOS MUÉRGANOS NACIONALES DEL PARTÍU**

**Art. 29.** Los muérganos nacionales del Partíu Asturianista son:

- La Xunta Nacional
- La Executiva Nacional
- El Tribunal del Partíu.

**Art. 30.** La Xunta Nacional ye'l muérganu de representación permanente, másimu ente congresos, de les agrupaciones y los militantes del Partíu.

**Art. 31.** La Xunta Nacional ta compuesta por:

- la Executiva Nacional.
- el Tribunal del Partíu.
- el Secretariu Xeneral de caúna de les agrupaciones del Partíu.
- los miembros del Gobiernu y los portavoces parlamentarios, con voz y ensin votu.
- militantes nomaos, en númberu variable, pola propia Xunta Nacional, a propuesta de la Executiva Nacional, siguiendo criterios de representatividá territorial o relevancia social.

A propuesta la Executiva Nacional podrán asistir a les sesiones de la Xunta Nacional, con voz y

ensin votu, cargos públicos o de representación, representantes de conceyos ensin agrupación constituída y otros militantes cuya presencia se talante valoratible.

**Art. 32.** La Xunta Nacional convócala la Executiva Nacional, debiendo mediar, polo menos, 72 hores ente la fecha de la convocatoria y l'aniciu les sesiones. Aconceyaráse trimestralmente con calter ordinariu, y estraordinariamente cuando lo alcuerde la Executiva Nacional o lo solicite un terciu los sos miembros con drechu a votu. La Xunta Nacional tará presidía pol Presidente del Partíu, que podrá nomar d'ente los sos miembros hasta tres persones pa que lu ayuden nes sos funciones.

La convocatoria propondrá l'Orde del Día, que podrá ser ampliáu, una vegada reunida, a propuesta d'un terciu los sos integrantes. Los alcuerdos tomaránse por mayoría simple. El quórum necesariu pa constituise válidamente será'l de la metade más ún de los sos representantes.

Les deliberaciones entamarán cola esposición de la propuesta sometida a debate, bien por un representante de la Executiva Nacional si esta fuera la proponente, o pol miembru que tenga fecho la propuesta; a esta esposición podrán seguir intervenciones a favor y escontra, tres les cuales el proponente podrá facer una cabera intervención; la Presidencia de la Xunta Nacional podrá llimitar el númberu d'intervenciones a favor y escontra, asina como l'asignación de tiempu pal debate y la so distribución ente los que tengan solicitao intervenir.

**Art. 33.** Los representantes de les agrupaciones na Xunta Nacional nun tán sometíos a mandatu imperativu, salvo que'l Conceyu l'Agrupación asina lo alcuerde respectu a asuntos que cinquen específicamente al so Conceyu o a los referíos nel artículu 65 d'estos Estatutos.

**Art. 34.** Son funciones de la Xunta Nacional:

- a) Convocar el Congresu Ordinariu del Partíu.
- b) Aprobar los programes electorales y de gobiernu.
- c) Elaborar o aprobar les candidatures del Partíu a les elecciones parlamentaries y municipales, d'alcuerdu colo expresao nel Títulu Séptimu d'estos Estatutos.
- d) Cubrir les baxes na Executiva Nacional y nel Tribunal del Partíu.
- e) Establecer, d'alcuerdu col informe la Executiva Nacional, les cuotes de los militantes.
- f) Conocer l'estáu financieru del Partíu de forma periódica y siempre que lo requiera la mesma Xunta Nacional.
- g) Escoyer d'ente los sos miembros un Comité d'Apelaciones, formáu por cinco persones.
- h) Aperiar y aprobar el Reglamentu'l Congresu y los proyectos de Ponencia.
- i) Nomar d'ente los sos integrantes, escluyíos los que formen parte de la Executiva Nacional, un comité qu'exercerá les funciones de Muérganu de Defensa de los Drechos del Afiliáu.
- i) Interpretar los Estatutos del Partíu y aprobar aquellas adaptaciones de los mesmos que vengán desixíos polos muérganos xudiciales o alministrativos competentes.
- k) Toles otres afitaes nestos Estatutos.

**Art. 35.** La Xunta Nacional funcionará en Plenu y en Comisiones.

Les comisiones crearánse por alcuerdu de la propia Xunta Nacional, que nomará asina mesmo a los sos miembros y delimitará les sos funciones.

En tou casu, formarás una Comisión de Garantías Democrátiques, qu'exercerá'l control de los dirixentes elexíos, fiscalizando, inspeccionando y interviniendo les actuaciones que realicen nel exerciciu les sos funciones. La Comisión de Garantías Democráticas podrá elevar a la Xunta Nacional informes afitaos sobre los actos de los dirixentes del partíu y cargos públicos que se separen de los principios democráticos o de los fines del partíu, espresaos nos sos estatutos y nes resoluciones del Congresu y de la Xunta Nacional.

Podrá asina mesmo elaborar códigos éticos sobre l'actuación de los dirixentes del partíu y cargos electos, que serán d'obligáu cumplimientu si algamaren l'aprobación de la Xunta Nacional.

**Art. 36.** La Executiva Nacional ye'l muérganu de representación y dirección del Partíu; lleva a cabu la política definía por Congresu y aprobada pola Xunta Nacional; alministra los bienes del Partíu; lleva les relaciones coles instituciones y les fuerces polítiques y sociales; encadarma'l llabor de les agrupaciones y los militantes; elabora, d'alcuerdu colos cargos públicos, la estratexa del Partíu nes cámares llexislatives y los ayuntamientos; executa los alcuerdos de los muérganos deliberantes del Partíu y los mandatos que –y arrecostinen estos Estatutos.

**Art. 37.** La Executiva Nacional ta formada por:

- Un Presidente
- Un Secretariu Xeneral
- Un Secretariu Finances
- El número de secretarios d'aria y vocales que s'establezan en cada Congresu.

La Executiva Nacional podrá facer un Reglamentu de funcionamientu internu, señalando funciones y responsabilidaes pa cada componente, asina como otre normes de funcionamientu. D'esti Reglamentu darase cuenta a la Xunta Nacional.

**Art. 38.** La Executiva Nacional renovarase cada cuatro años pol sistema mayoritariu en llistes cerraes. El número de candidatos presentaos na llista ganadora, asina como los cargos atribuyíos, determinará la composición de la Executiva Nacional. En tou casu, enxertarán un candidatu a Presidente y otru a Secretariu Xeneral. La votación será secreta.

**Art. 39.** Les baxes producies con posterioridá al Congresu na Executiva Nacional cubriráles la Xunta Nacional, salvo que dimitiesen la metada más ún de los miembros escoyíos nel Congresu, o'l Presidente, en cuyu casu la Xunta Nacional convocará Congresu Extraordinariu pa escoyer nueva Executiva.

**Art. 40.** El Presidente coordina y afala'l llabor de la Executiva; tien la representación política del Partíu y ye'l so portavoz más autorizáu. El Secretariu Xeneral caltién la coordinación de la Executiva Nacional, acostina colos asuntos que-y delegue'l Presidente y sustitúyelu nos casos d'ausencia o enfermedá.

El Secretariu Finances controla la tesorería del Partíu y xixila'l pagu les cuotes.

**Art. 41.** Les deliberaciones de la Executiva Nacional son secretes, salvo alcuerdu espresu en contrariu tomáu por mayoría absoluta los sos miembros.

La Executiva Nacional aconceyarase como mínimo una vegada al mes, convocada pol Secretariu Xeneral con 72 hores, al menos, d'antelación a la fixada pal aniciu de les sos sesiones. La convocatoria propondrá l'Orde del Día, que podrá ser ampliáu, una vez aconceyada, a propuesta de cualquier de los sos integrantes.

Les deliberaciones entamarán cola esposición de la propuesta sometida a debate, que podrá ser fecha por cualquiera los sos miembros; a esta esposición podrán seguir intervenciones a favor y escontra, tres les cuales el proponente podrá facer una cabera intervención; el Secretariu Xeneral del Partíu, al que-y corresponde la dirección de los debates nel ámbitu de la Executiva Nacional, podrá llimitar el número d'intervenciones a favor y escontra, asina como l'asignación de tiempu pal debate y la so distribución ente los que tengan solicitao intervenir.

Los alcuerdos tomaranse por mayoría simple. El quórum necesariu pa constituse válidamente será de la metada más ún de los sos componentes.

**Art. 42.** La Executiva actúa colexadamente, pero caún responderá personalmente de l'actividá desendolcada nes estayes de trabayu que tuviere encomendaes.

**Art. 43.** Los miembros de la Executiva Nacional cesen nes sos funciones:

- a) Por pruyimientu propiu.
- b) Por perda la so condición de militante.
- c) Por perda la confianza política la propia Executiva o la Xunta Nacional.

Ha entendese perdida la confianza política cuando, depués d'una moción nesi sen presentada pola Executiva Nacional, la Xunta Nacional aprobare por mayoría, y en votación secreta, la moción presentada so un de los miembros de la Executiva.

## **TÍTULO QUINTU: DE LOS ESPEDIENTES SANCIONAORES**

**Art. 44.** El Tribunal del Partíu ye'l muérganu competente p'aperiar, informar y resolver los espedientes de sanción a los militantes, ensin perjuiciu la posibilidá d'apelaciones delante la Xunta Nacional. El Tribunal del Partíu fórmenlu tres militantes escoyíos nel Congresu'l Partíu, cola mesma fórmula que la emplegada pa la escoyeta la Executiva Nacional. Les baxes ente Congresos cubriráles la Xunta Nacional.



**Art. 45.** L'alcuertu solicitando l'apertura l'espeditu xunto col escritu de denuncia remitirase a la Executiva Nacional, que lu treslladará al presidente del Tribunal; nel escritu de treslláu nomarase un Secretariu Instructor, encargáu de la documentación del espeditu y d'afalar la so tramitación, qu'asistirá con voz y ensin votu a les sesiones del Tribunal.

**Art. 46.** L'espeditu sancionador entamarase col escritu de denuncia, y deberá tar termináu d'entro los tres meses siguientes; al escritu arreyarase los testimonios, pruebes y evidencias que'l Tribunal talante convenientes y, d'esistir, l'escritu de descargu del denunciáu; el plazu pa presentar l'escritu de descargu sedrá como mínimo de siete díes. Nel propiu espeditu deberá quedar acreditao que'l pliegu cargos fue comunicáu al espeditáu, asina como testimoniu suficiente de les dilixencies averiguatories feches pol Tribunal y el so resultáu.

El Tribunal resolverá, a propuesta del Secretariu Instructor y na primer sesión que tuviere, si procede o non la suspensión cautelar de derechos del espeditáu.

En tou casu, el Tribunal acordará la suspensión cautelar de la afiliación de los afiliados incursos nun procesu penal respectu de los cuales téngase dictao autu d'apertura de xuiciu oral por un delitu relacionáu cola corrupción.

**Art. 47.** Nel casu de que la Executiva Nacional o la Xunta Nacional talantasen que, nos casos d'espeditu colectivu a toa o parte d'una Agrupación, a la so Executiva, o individualmente al Secretariu Xeneral de la mesma, el funcionamientu normal de l'Agrupación fuere perdifficultosu o imposible, podrán nomar una Comisión Xestora de l'Agrupación, con independencia les midides cautelares qu'adopte'l propiu Tribunal.

La Comisión Xestora, formada por un númberu de persones que s'estime afayadizu y per tiempu determináu, sedrá nomada pola Executiva Nacional, y deberá caltener el funcionamientu ordinariu l'Agrupación hasta tantu se resuelvan los espeditos o se convoquen nueves eleiciones na Agrupación.

**Art. 48.** La resolución del Tribunal sedrá d'una d'estes menes:

- a) Sobreseimientu.
- b) Suspensión de derechos durante'l tiempu qu'estableza'l Tribunal.
- c) Inhabilitación pa ser candidatu nes llistes electorales.
- d) Inhabilitación pa ocupar cargos internos.
- e) Espulsión del Partíu.

Estes sanciones puen ser acumulables.

En tou casu, el Tribunal acordará la expulsión del Partíu d'aquellos que fueren condenaos por un delitu relacionáu cola corrupción.

**Art. 49.** Nel casu de que l'espeditu fuere colectivu, les resoluciones podrán ser:

- a) Sobreseimientu.
- b) Alvertencia d'atención.
- c) Suspensión de toa o parte l'Agrupación.
- d) Espulsión del Partíu.

**Art. 50.** Les resoluciones del Tribunal podrán recurrise nel plazu de siete díes dende que fueren notificaes, mediante escritu empobináu al propiu Tribunal. Nel escritu de retolique asoleyarase les alegaciones que'l retolicante talante afayadices, ensin qu'haiga llugar a otra manifestación de parte.

**Art. 51.** L'escritu retolicante amestrase al espeditu sancionador, empobinándose darréu tou ello, al través de la Executiva Nacional, al Comité d'Apelaciones de la Xunta Nacional.

**Art. 52.** El Comité d'Apelaciones propondrá a la Xunta Nacional una resolución, que se someterá a votación nel primer conceyu que se celebre dende que terminare'l so informe.

**Art. 53.** Sedrán causes de sanción:

- a) El descréditu públicu, ufiensa o menospreciu al Partíu o a los sos muérganos.
- b) L'abierta rebeldía escontra les decisiones aprobaes polos muérganos del Partíu.

- c) Manifestase pública o privadamente contra la ideoloxía'l Partíu aprobada nes resoluciones del Congresu.
- d) Apropiase de bienes del Partíu.
- e) Engafentar dolosamente les relaciones personales ente militantes, o atentar contra l'honor o buena fama los mesmos.
- f) Dexar de pagar les cotizaciones durante seis meses ensin causa xustificada. Nel casu los cargos públicos, sedrá asina mesmo causa de sanción la falta pagu les gabites a que tuvieren obligaos.
- g) Incumplir, una y otra vegaes y a les clares, la so obligación de colaborar nes xeres y llabores del Partíu, señalaes nel artículu 5. c).
- h) Incumplir coles obligaciones de cargu electu, en cualaquiera de les estayes posibles: Agrupación, Xunta Nacional, Executiva Nacional o cargu de representación institucional.  
Les causes de sanción pueden ser individuales o colectives.

## **TÍTULU SEXTU: DE LES FINANCES Y L'ALMINISTRACIÓN**

**Art. 54.** Los militantes sofitarán les actividaes del Partíu col pagu d'una cuota mensual. La cuantía la mesma establecerá la Xunta Nacional a propuesta la Executiva Nacional. El cuadru de cotización tendrá en cuenta les posibles situaciones económiqes del militante.

Por razones de mena xustificada la Executiva Nacional podrá eximir del pagu de les cuotes a dalgún militante, siempre per un períodu determináu. Del mesmu mou y manera, y tamién por razones de mena xustificada, la Executiva Nacional podrá establecer la moratoria de pagu de forma xeneralizada pal conxuntu los militantes. Esta suspensión nun acostinará perda dalguna de los drechos de los militantes qu'a la fecha la suspensión tuvieren en posesión de los mesmos.

**Art. 55.** El Partíu Asturianista, como organismu unitariu, tien un patrimoniu únicu y una alministración centralizada.

En dengún casu s'emplegarán cuentas bancaries personales pal cobru cuotes, o'l depósitu o alministración los fondos del Partíu.

El presidente'l Partíu podrá delegar facultaes d'estricta alministración y disposición de fondos nos tesoreros de les agrupaciones.

**Art. 56.** La Executiva Nacional aperiará anualmente'l presupuestu'l Partíu, que sedrá aprobáu pola Xunta Nacional. Néi tarán recoyíos los ingresos y gastos ordinarios de caltenimientu les sedes del Partíu, asina como les dotaciones a les agrupaciones pa les sos actividaes, ensin perxuiciu de disponer partíes extraordinaries cuando fuere necesario.

La Executiva Nacional aprobará dientru los tres primeros meses del añu, d'alcuertu cola llexislación vixente, les cuentas del exerciciu precedente, que serán remitíes al Tribunal de Cuentas.

**Art. 57.** Enantes de cada Congresu Ordinariu del Partíu, el Secretariu Finances presentará delante la Xunta Nacional un informe sobre la tesorería y el balance económicu del Partíu.

**Art. 58.** Los cargos electos y de representación, asina como los funcionarios y empleaos del Partíu, agabitarán les finances del mesmu con un porcentaxe de los ingresos que devenguen como tales cargos, funcionarios o empleaos.

Asina mesmu, les agrupaciones, grupos de conceyales y grupos parlamentarios, tendrán la obligacion de tresferir al Partíu los ingresos que desurdan de la representación colectiva nes instituciones conceyiles y parlamentaries.

**Art. 59.** La Xunta Nacional establecerá, d'alcuertu cola Executiva Nacional, les modalidaes y fórmules d'una y otra collaboraciones financieras. En tou casu, la Executiva Nacional estudiará con caún de los cargos y empleaos la so propia condición económica, p'adequar l'agabitamientu financieru a cada circunstancia particular.

**Art. 60.** La Executiva Nacional del Partíu ostenta la plena representación llegal del mesmu, tanto pa la realización d'actos civiles o mercantiles como alministrativos, teniendo la facultá de representalu en xuiciu y fuera d'él.

La Executiva Nacional podrá delegar, mediante l'otorgamientu los correspondientes poderes, l'exerciciu de toes o dalguna de les facultaes que llegalmente-y correspunden, tanto en persones pertenecientes a la propia Executiva como en persones ayenes a ella. Los poderes caducarán, salvo confirmación espresa, inmediatamente dempués de la renovación de la Executiva Nacional.

El responsable económico-financieru del Partíu será nomáu pola Xunta Nacional a propuesta de la Executiva Nacional; la persona nomada deberá tener reconocida formación y capacidá técnica na materia, y nun tar afectada por dala prohibición o incompatibilidá prevista na llexislación aplicable al casu.

## **TÍTULO SÉPTIMU: DE LA FORMACIÓN DE CANDIDATURES**

**Art. 61.** Les candidatures del Partíu nes convocatories electorales aprobaráles la Xunta Nacional.

Los candidatos al Congresu y al Senáu, asina como al Parlamentu Européu, escoyerálos la Xunta Nacional, considerando los criterios remanaos nes agrupaciones y les propuestas de la Executiva Nacional.

**Art. 62.** Los candidatos a la Xunta Xeneral del Principáu escoyerálos la Xunta Nacional d'ente los nomes presentaos poles agrupaciones y la Executiva Nacional, teniendo en cuenta'l sofitu algamáu por caún. Les agrupaciones podrán aprobar el mandatu imperativu a los sos representantes respectu la votación del cabezaleru de llista pola so circunscripción, siempre que fuere aprobáu pola mayoría absoluta del Conceyu.

**Art. 63.** Los candidatos municipales en cada conceyu propondrálos el Conceyu l'Agrupación correspondiente, ratificándolos la Xunta Nacional.

Cuando nun tuviere constituida Agrupación, la Executiva Nacional propondrá la candidatura, consultando endenantes colos militantes qu'hubiera nel conceyu.

Si la Executiva Nacional punxere pilancos al cabeza llista presentáu pola Agrupación, tendrá esta que reafitase o proponer unu nuevu. De reafitase, sedrá la Xunta Nacional la qu'escueya ente'l propuestu pola Agrupación y, nel so casu, el propuestu pola Executiva Nacional.

## **TÍTULO OCTAVU: DE LES RELACIONES ENTE'L PARTÍU Y LOS CARGOS PÚBLICOS**

**Art. 64.** Los diputaos y conceyales del Partíu programarán y executarán los trabayos parlamentarios y conceyiles acomuñaos cola Executiva Nacional, nel marcu la política aprobada pola Xunta Nacional y les resoluciones del Congresu.

La Executiva nacional, xunto col restu los muérganos y militantes del Partíu, sofitarán l'actividá de los cargos públicos nes instituciones.

**Art. 65.** La disciplina votu ye obligatoria pa tolos cargos públicos. Nostante, la Xunta Nacional podrá facer una llista los asuntos nos que, en virtú de la materia y por razones de llibertá de conciencia, los cargos públicos quedarán dispensaos de la disciplina votu.

**Art. 66.** Los cargos públicos informarán a los muérganos del Partíu sobre los debates, comunicaciones y propuestas de que tengan conocimientu; llevarán a cabu, asina mesmu, les iniciatives parlamentaries o conceyiles, o d'otra mena, que remanezan daquellos.

## **TÍTULO NOVENU: DE LA LLINGUA'L PARTÍU**

**Art. 67.** La llingua oficial del Partíu ye l'asturianu, habiendo redactase nella toles actes y documentos oficiales de calter internu. Los militantes tienen el drechu d'espresase n'asturianu o castellanu, ensin que puean sufrir por ello dala discriminación. El Partíu afalará ente los militantes la conocencia, usu y dominiu

del asturianu.

Esternamente, el Partíu manifestarás n'asturianu o castellanu según les circunstancies, destinatarios o conveniencias.